

## BATAKURU PUULUSA HAA E BE ROOMU BEN

<sup>1</sup> Immorde e an min Puulusa, nduu kurkaadu Iisaa Almasiihu on, noddaado wonugol \*sahaabaajo, wadaado feere fii yottingol Kibaaru Mooyo Alla on. <sup>2</sup> Hari Allaahu on fodiriino oo Kibaaru immorde e annabaabe ben e nder bindi seniidiñ din. <sup>3</sup> Tawi ko on Kibaaru sifii ko fii Bidso makko on: ka bañje bandu ko e bolondaa Daawuuda o jibinaa, <sup>4</sup> ka bañje \*Ruuhu Seniido on, immintineede makko e hakkunde maybe ben banginirii bawgal ko o \*Bidso Alla, dñun ko Iisaa Almasiihu Joomi men on. <sup>5</sup> Ko kanko men hebiri moyyere e sahaabankaaku fii ardagol yimbe e nder leyyi din fow e innde makko fii gomdingol mo e softagol mo. <sup>6</sup> Onon kadi hidon tawdaa e mabbe, onon bee be Alla noddi yo wonu be Iisaa Almasiihu on. <sup>7</sup> Onon wonbe Roomu ben fow, noddaabe wonugol be Alla yidi e jeyaaabe Alla: yo buttu e moyyere wonan on immorde e Alla, on Baabaajo men, e Iisaa Almasiihu Joomi on.

### *Fii Yela Puulusa on Yahugol Roomu*

<sup>8</sup> Mido jarnude taho on Alla an, immorde e Iisaa Almasiihu on, fii mon on fow, ko fii gomfinal mon ngal ko lollungal e aduna on fow. <sup>9</sup> Alla, on mo mi rewirta ruuhu an on e nder yottingol Kibaaru Mooyo Bidso makko on, ko seedee an wonde mido maandinde fii mon nande woo ka toraaje an. <sup>10</sup> Awa kadi

mido toraade Alla soono woo, si tawii ko faale makko hebugol feere no mi yaara ka mon jooni. <sup>11</sup> Ko fii mido faalaa yi'ude on fota fii hewtingol on dokkal goo iwrungal e Ruuhu Alla on fii no tabitiron, <sup>12</sup> maadun fii no wakkilindiriren ka mon, mo kala e men wakkilora gomdfinal oya ngal.

<sup>13</sup> Mi faalaaka yo on ronku andude, yo musibbe an, wonde soono woo mi ebbay yahugol yi'a on, fii no mi sojitira battane moyye hakkunde mon, onon kadi, wano beya be wonaa Yahuudiyanke heddiibe non. Kono haa jooni mi hebaali feere. <sup>14</sup> Ko fii no farlii mi andingol \*Gereekiyankeeben e leyyi ci finaa din, e faamube ben e njofoobe ben. <sup>15</sup> Ko d'un wadi si mido faalaa yottingol e mon Kibaaru Mooyo on, onon wonbe Roomu ben kadi.

<sup>16</sup> Ko fii mi hersiraa Kibaaru Mooyo on, d'un ko bawgal Alla fii kisiyee wonannde kala gomdfindo, ko adii kon taho ko \*Yahuudiyankeeben, hikki don be wonaa Yahuudiyanke ben. <sup>17</sup> Ko d'un wadi, peewal Alla ngal no banginireede Kibaaru Mooyo on, gila ka gomdfinal fuddi haa ka ngal hatti, wano windori non: «Feewudo on wuuiray gomdfinal ngal.»<sup>a</sup>

### *Fii Tikkere Alla nden e hoore Yeddube mo ben*

<sup>18</sup> Tikkere Alla nden no bangi iwrude ka kammu e hoore kala junuubu e kala bone ko yimbe suudiraybe goonga on kuude mun bondse wadata. <sup>19</sup> Ko fii ko waawaa andeede e Alla kon no feejani be kambe, bay Alla fejjinanii be

---

<sup>a</sup> **1:17** 1.17 Hab. 2.4

dun. <sup>20</sup> Bay, ko yi'otaako kon e Alla, d'un ko bawgal makko poomayankewal ngal e allankaaku makko ngun, kuude makko den no bangini dun fota gila ka fuddfoode aduna. Be alaa lamitorgal. <sup>21</sup> Ko fii nde be andunoo Alla, be ronki mo mawninirde wa Alla, awa kadi be jarnaali mo, kono be majjiri haalaaji mehi, berde maßbe ðe alaa faamu den kadi yollii ka nder nibe. <sup>22</sup> E nder ko be mantorta ko be faamube kon, be latii njofoobe. <sup>23</sup> Be lontiniri mangu Alla, mo maayataa on, mbaadiiji lontiidi neddsanke maayaydo e colli e kulle yaarooje koyde nay e kulle daasotoode.

<sup>24</sup> Ko d'un wadi si Alla accidi be e himmeeji berde maßbe e angal laabal, fii no be hayfinira balli maßbe din kambe tigi. <sup>25</sup> Dun ko ben lontinirbe goonga Alla on fenaande, yanganiibe rewi ko tagaa kon, doo e be yanganaade rewa Tagudo on, on mo mantoore wonani haa poomaa. Aamiina!

<sup>26</sup> Ko d'un si Alla accidi be e himmeeji maßbe hersiniidi din. Ko fii rewbe maßbe ben lontinirii dewle mun den e kuufse harmude. <sup>27</sup> Worbe ben kadi wano non, be seli yiidugol e rewbe ben, hibe hubbani faaleeji hakkunde maßbe kambe worbe ben, hibe yiida hakkunde maßbe e mbalndi, hibe hettude njoddi handundi e majgere maßbe nden. <sup>28</sup> Bay be sikkii moyya ka be anda Alla, Alla accidi be e ngun faamu boyliingu, fii wadugol piiji di haanaa. <sup>29</sup> Ko be heewube nooneeji di feewaa e bonkiji e miile e bone e nawliigu e warugol e yeddondiral e kippugu e hunyeendi e baddi. <sup>30</sup> Ko be jo'oobe,

ajube Alla, yennoobe. Ko be mawnintiniibe e mantiibe e sincoobe ko boni e murtanbe mawþe mun,<sup>31</sup> be aldaa e faamu, be sellaa kongol, be aldaa e giggol, be aldaa e yurmeende.<sup>32</sup> Fii kala hibe andi yamiroore Alla feewunde nden ko wi'i kon wonde ben wadaybe din piiji ko foddube e mayde, hibe wadfude d'un, hibe jabani kadi ben wonbe wadfude d'un.

## 2

### *Fii Naawoore Alla Feewunde nden*

<sup>1</sup> An kadi non, oo feloowo, a maraa lamitorgal woo. Ko fii nde hida fela beya, haray hida fawude hoore maa naawoore an tigi. Ko fii an, wondo felude on, hida wadfirde wa maþþe.  
<sup>2</sup> Hiden andi, ben warroobe non, Alla naawiray be goonga on. <sup>3</sup> An oo feloowo ben wadiroobe non, hara hida wadira non tigi, a sikku a daday naawoore Alla nden? <sup>4</sup> Kaa a yawiti ngaluuji moyyere makko nden e mujjal makko ngal e yondinaare makko nden, e baawo andugol wonde moyyere Alla nden no poodude ma e tuubuubuyee?

<sup>5</sup> Kono sabu sattere maa fii nden e bernde maa yoorunde nden, hida mooba tikkere fii nalaande tikkere nden, d'un ko fii jande feenugol naawoore Alla feewunde nden, <sup>6</sup> on Jonni-toyoowo mo kala njoddi kuude mun d'en.  
<sup>7</sup> Ngurndan poomayankejan\* dan wonanay ñajniibe e wadfugol ko moyyi, ðabba darja on e teddungal e ngurndan dan lannataa dan,<sup>8</sup> kono wondube e haasidi ben, salii doftaade goonga on fii doftagol angal peewal ngal: tikkere e

monee no maranaa be. <sup>9</sup> Satteende e annde wonanii kala wadoowo ko boni, ko adii kon ko Yahuudiyankeebē ben, hikki dōn be wonaa Yahuudiyanke ben. <sup>10</sup> Kono darja e teddungal e buttu wonanii kala on wadoowo ko moyyi, ko adii kon ko Yahuudiyankeebē ben, hikki dōn be wonaa Yahuudiyanke ben. <sup>11</sup> Ko fii gidaale alaa ka Alla.

<sup>12</sup> Kala ben wadubē junuubu e baawo andugol Sariya on, mulay e baawo Sariya on. E kala non kadi waduso junuubu e hoore andugol Sariya on, jaawirte Sariya on. <sup>13</sup> Ko dūn wadi, hinaa hedotoobē Sariya on woni feewube yeeso Alla, kono ko doftotoobē Sariya on jogortee feewube. <sup>14</sup> Si tawii non be wonaa Yahuudiyanke ben, ben be maraa Sariya, wadii ko Sariya on wi'i kon tigi, dūn ko ben be maraa Sariya, haray hibe mari sariya fii mabbe kambe tigi. <sup>15</sup> Dun haray be banginii wonde kuugal Sariya on no windii ka berde mabbe, fondo mabbe ngon no seeditaade dūn, miijooji mabbe dīn kadi no felude be e saa'i goo, e saa'i goo no dandude be. <sup>16</sup> Ko dūn fow feepoyta nande Alla jaawoyta miijooji berde yimbe suudiidi dīn, o jaawiroya dī iisaa Almasiihu on, wano Kibaaru Moyyo mo mi yottini on holliri non.

### *Fii Yahuudiyankeebē ben e Sariya on*

<sup>17</sup> An oo wi'itiido Yahuudiyanke, hoolordo Sariya on, wondo mantorde Alla, <sup>18</sup> andudo faale makko on, waawudo sendindirde ko buri moyyude kon, bay ko a jangirfo Sariya on, <sup>19</sup> an oo hooliido wonay ardotoodo bumbe, hoolii

kadi wonanay ben wonbe ka niwre ndaygu,  
<sup>20</sup> andinoowo ben be alaa faamu, karamokoojo faybe, bay hida mari gandal timmungal e goonga selludo ka nder Sariya: <sup>21</sup> awa an, oo wondo jannude beya, e hara a alaa jannitaade an tigi? An, oo waajotoodo wota wujje, hinaa hida wujjude? <sup>22</sup> An, oo wondo wi'ude wota jeene, hinaa hida jeenude? An, oo apudo sanamu, hinaa hida wujjude di, huutoraa? <sup>23</sup> An, oo darjinordo Sariya on, hinaa hida hayfinirde Alla bonnugol Sariya on? <sup>24</sup> Ko fii no windii: «Sabu mon innde Alla nden no hoyneede e hakkunde be wonaa Yahuudiyanke ben.»<sup>b</sup>

<sup>25</sup> No fellitaa wonde \*sunninegol no hitti, si tawii a huutorii Sariya on, kono si a bonnii Sariya on, haray ko sunninadsaa kon wonii meere. <sup>26</sup> Si tawii non mo sunninaaka on doftike yamirooje Sariya on, hara angal sunninelgol makko ngol jabirtaake wa sunninaado? <sup>27</sup> Awa, on neddo mo sunninaaka e bandu, timmindo Sariya on, jaawete an oo mo doftaaki Sariya on, fii kala hida wondi e bindi dñin e sunninannde nden. <sup>28</sup> Yahuudiyankeagal wonaa ka kene, sunninannde kadi hinaa feenunde e bandu nden. <sup>29</sup> Kono Yahuudiyankeeojo, ko wondoo dñun ka nder. Sunninannde haqiqaaare nden ko nde ka bernde, yaadunde e Ruuhu Allaahu on, hara hinaa yaadunde e bindi nden. Mantoore sifa on Yahuudiyankeeojo wonaa e yimbe ben iwrata, kono ko e Alla.

---

<sup>b</sup> **2:24** 2.24 Isa. 52.5 e Haz. 36.22

# 3

## *Fii Angal Peewal Yimbe ben*

<sup>1</sup> Ko bural hongal Yahuudiyanke mari? E ko hondun woni nafa \*sunninegol? <sup>2</sup> No mari nafa e di fow. Ko adii kon, daaluyeeji Alla din ko Yahuudiyankkeebe ben halfinaa. <sup>3</sup> E ko hondun si wobbe e mabbe wonaali sella-findeebe? E hara ngal angal sella-findeyaagal mabbe duytay godfun e sella-findeyaagal Alla ngal? <sup>4</sup> Pellet hinaa non! Hay si yimbe ben fow ko fenoobe, Alla kan ko goongaajo, wano windori non wonde: «Peewal maa ngal no feenira kongudi maa din, nde naawadaa woo wonaa fooludo.»<sup>c</sup>

<sup>5</sup> Si tawii non angal peewal men ngal feppinii wonde Alla ko feewudo, haray ko hondun wi'eten? Kere si Alla tippinii tikkere makko nden, haray hinaa o Feewudo? (Dun ko haala nedfanke non!) <sup>6</sup> Pellet hinaa non! Si hinaa dfun, ko honno Alla naawirta aduna on? <sup>7</sup> E si tawii fenaande an nden no burtude banginde goonga Alla on fii darja makko on, haray ko fii hondun min tigi mi naawirtee wa junuubankeejo haa jooni? <sup>8</sup> Awa ko hondun hadi wi'en, wano ay-binoobe goo wi'irta wonde hidse wi'a: «Waden ko boni, fii ko moyyi yo yaltu.»? Donkineede ben yimbe ko ko feewi!

## *Fii no Fow Woniri e nder Junuubi*

<sup>9</sup> Awa, enen Yahuudiyankkeebe, ko hondun burden beya? Hay fus! Ko fii en banginii

---

<sup>c</sup> **3:4** 3.4 Zab. 51.6

wonde kala Yahuudiyankeejo e mo wonaa Yahuudiyanke no e nder junuubu, <sup>10</sup> wano windori non:

«Feewudo alaa, hay e gooto non!

<sup>11</sup> Hay gooto alaa faamu,

hay gooto alaa dabbude Alla.

<sup>12</sup> Fow ko huccube Alla,

awa kadi be fow ko be boyliibe,

hay gooto alaa wondo wadude ko moyyi,

hinaa non hay e gooto!

<sup>13</sup> Konondi ma be din ko genaale udditiide,

hibe huutora dende ma be den fii janfagol,

tuutaade toni ma be din ko tooke mboddi.

<sup>14</sup> Kundule ma be den no heewi kuddi e hahhannde,

<sup>15</sup> koyde ma be den no hawjani hibbugol yiiyan,

<sup>16</sup> yeebaare e tampere no ka date ma be.

<sup>17</sup> Be andaali datal buttu ngal,

<sup>18</sup> awa kadi kulol Alla alaa e gite ma be.»<sup>d</sup>

<sup>19</sup> Hiden andi wonde ko Sariya on wi'i kon fow ko wonbe e ley Sariya on wi'aa, fii no kala hunduko ombiree, e no Alla jaawira yimbe aduna on fow.

<sup>20</sup> Ko fii hay gooto jogortaake feewudo yeeso Alla fii ko o dsoftii Sariya on kon, ko fii ko immorde e Sariya on junuubu andori.

### *Fii Peewal Immorde e Gomdfinal*

<sup>21</sup> Kono jooni, Alla fejnini ko honno goddo waawetee jogoreede feewudo yeeso Alla e baawo Sariya on, wano Sariya on e annabaabe ben seeditori non. <sup>22</sup> Alla jogoray yimbe ben feewube sabu ko be gomdfini Iisaa Almasiihu

---

<sup>d</sup> **3:18** 3.10-18 Zab. 5.9, 10.7, 14.1-3, 36.2, 53.2-4, 140.3, e Isa. 59.7-8

on kon, d'un ko gomdinbe ben fow. Ko fii sendondiral alaa: <sup>23</sup> fow wadii junuubu, be waawataa hewtude mangu Alla ngun. <sup>24</sup> Awa ko tippude e dokkal moyyuki makko kin be jogoraa feewube rewrude e cottudi wondi e Iisaa Almasiihu on ndin, <sup>25</sup> on mo Alla toddii wonugol sadaka fii, rewrude e yiiyan makko d'an, no gomdinbe mo ben hebira yaafuyee junuubaaji. Alla wadi dun fii bangingol peewal mun ngal, ko fii o donkinaali bee wadfunoobe junuubi feyyunoodi din fewndo mupal makko ngal. <sup>26</sup> O faalaama banginde peewal makko ngal e oo saa'i fewndiido, d'un fow ko fii no andiree ko o Feewudo, o jogitora on gomdfindo Iisaa wa feewudo.

<sup>27</sup> Ko dalil hondun non mantortee? Dalil woo alaa! Maa ko sabu hondun? Hara ko kuudse d'en? Oo'o, kono ko gomdfinal ngal. <sup>28</sup> Ko fii hid'en wi'a wonde ko sabu gomdfinal ngal neddo jogoraa feewudo, e baawo dsoftagol Sariya on. <sup>29</sup> Kaa hara Alla ko Alla Yahuudiyankeebi ben tun? E hinaa o Alla be wonaa Yahuudiyanke ben kadi? Hiiyii, ko o Alla be wonaa Yahuudiyanke ben kadi! <sup>30</sup> Bay ko Alla gooto woni jogordoo sunninaabe ben feewube sabu gomdfinal mabbe ngal, o jogora be sunninaaka ben kadi feewube sabu gomdfinal mun ngal. <sup>31</sup> E hara d'un no firi wonde en bonnitirii Sariya on gomdfinal ngal? Pellet wonaa non! Ka liddu dun, hid'en tambitaade Sariya on!

## 4

*Misal Yettaangal e Ibraahiima*

<sup>1</sup> Awa ko hondun wi'eten fii Ibraahiima, oo maamiraawo amen iwrude ka yiyan? Ko hondun o hebi? <sup>2</sup> Si tawno ko sabu kuude den Ibraahiima jogorano feewudo, harayno himo mari feere mantagol. Kono hinaa non woniri yeeso Alla! <sup>3</sup> Ko hondun bindi din wi'i e dun? «Ibraahiima gomdfini Alla, ngal gomdfinal makko jogoranaa mo peewal.»<sup>d</sup> <sup>4</sup> E hin-le, on mo golli, njoddi makko ndin jogitoranaaka mo wa dokkal, kono ko ko haani. <sup>5</sup> On mo gollaali non, kono gomdfini Alla on Jogoroowo be feewaa ben feewube, haray gomdfinal makko ngal no jogoranaa mo peewal. <sup>6</sup> Daawuuda kadi no haali fii maloore neddo mo Allaahu on jogitori feewudo e baawo kuugal:

<sup>7</sup> «Maloore wonanii ben be bonkijji mun din yaafaa,  
be tawata junuubaaji mun din montaama.

<sup>8</sup> Maloore wonanii on neddo,  
mo Joomiraado on jogoraali junuubu mun.»<sup>e</sup>

<sup>9</sup> E hara nden maloore ko fii sunninaabe ben tun, kaa ko fii be sunninaaka ben kadi? Ko fii hidien wi'a: «Ibraahiima gomdfini Alla, ngal gomdfinal makko jogoranaa mo peewal.» <sup>10</sup> Ko honno o wa'unoo kanko Ibraahiima fewndo ngal jabanaa mo? Hari o teddinaama, kaa o teddinaaka? Hari o teddinaaka taho, ko mo o teddinaaka wonnoo <sup>11</sup> fewndo o hendii maande \*sunninegol ngol, wa battatere peewal ngal o hebiri gomdfinal ngal, fewndo ko o teddinanooka. Ko non o woniri ben kala gomdfindo, hay be sunninanooka ben,

<sup>d</sup> 4:3 4.3 Fud. 15.6    <sup>e</sup> 4:8 4.8 Zab. 32.1-2

fii no be jogoree feewube. <sup>12</sup> O laatii kadi ben sunninaabe ben, hinaa non sunninaabe ben tun, kono kadi ko o ben ben jokkube laawi gomdfinal ngal kanko ben men Ibraahiima o hebunoo ngal wa fewndo ko o teddinanooka taho.

<sup>13</sup> Ko dun wadi, hinaa tippude e Sariya on Ibraahiima e jurriya mun on fodiraa ronugol aduna on, kono ko tippude e peewal iwrungal e gomdfinal ngal. <sup>14</sup> Si tawno ko tippude e Sariya on ronirten, harayno gomdfinal ngal ko fus, awa kadi harayno fodaari ndin firtaama. <sup>15</sup> Ko fii Sariya on ko tikkere rimata. Ka Sariya on non alaa d' on, haray bonnugol Sariya on alaa.

<sup>16</sup> Awa, ko d'un wadi ko gomdfinal ngal fodaari ndin ronirtee, fii no laatora dokkal moyyere, fii no jurriya on fow hendora fodaari ndin, wonaa non jogiibe Sariya on tun, kono ko hay jogiibe gomdfinal Ibraahiima maama men ngal en fow, <sup>17</sup> wano windori non: «Mi wadii ma maamaajo leyyi duudsudi.»<sup>f</sup> Ko o maama men en fow yeeso Alla, on mo o gomdfini, on Yedoowo maybe ben ngurndan, on Woodinoowo ko woodanooka. <sup>18</sup> O tanyinii ka tama'u alaa, o gomdfini. Ko nii o woniri maamaajo leyyi duudsudi, wano daaliranoo non: «Ko nii jurriya maa on duudsiroyta!»<sup>g</sup> <sup>19</sup> E baawo lo'angol gomdfinal ngal, o tawi bandu makko ndun fayda ko mayndu, ko fii hari moggo o teeminii, awa kadi hari dimdimol Saarata ngol ko mayngol. <sup>20</sup> Awa o hutitoraali fodaari Alla ndin sabu angal gomdfinal, kono o wonti tiida-gomdfinaljo, o mawnini Alla. <sup>21</sup> O felliti

---

f **4:17** 4.17 Fud. 17.5    g **4:18** 4.18 Fud. 15.5

wonde Alla no mari bawgal hunnugol ko o fodi kon. <sup>22</sup> Ko d'un wadi si gomdfinal makko ngal jogoranaa mo peewal. <sup>23</sup> Hinaa fii makko kanko tun d'un windiraa, <sup>24</sup> kono ko fii men, enen kadi, enen bee jogorteebe feewube, gomdfinal be on Immintindo Joomi men on Iisaa e hakkunde maybe ben, <sup>25</sup> ittaado sadaka fii bonnereeji men din, e immintinaado fii yo en jogoree wa feewube.

## 5

### *Fii Humondiral e Alla*

<sup>1</sup> Nde tawnoo en jogoraama feewube sabu gomdfinal men ngal, hid'en mari buttu e Alla rewrude e Iisaa Almasiihu Joomi men on. <sup>2</sup> Ko sabu makko hebirden, iwrude e gomdfinal ngal, naatirgal e oo sulfu, mo wond'en e mun, tabituden. Hid'en mantorde on tama'u mo mard'en fii mangural Alla ngal. <sup>3</sup> Ko beyditii e d'un, hid'en mantorde hay e nder tampereeji din, e hoore andugol wonde tampereeji din rimay njan Nagol, <sup>4</sup> njan Nagol ngol kadi ardo haa e jikku timmudo, jikku timmudo on kadi adda tama'u. <sup>5</sup> E hin-le tama'u on hersinoytaa, ko fii Alla juuriri giggol makko ngol ka berde men \*Ruuhi Seniido mo yedaden on.

<sup>6</sup> Ko fii fewndo tawnoo en maraa doole, e saa'i tod'saad'o on \*Almasiihu on mayno fii be rewataa Alla ben. <sup>7</sup> Ko karahan goddo jabirta maayande aaden feewudo, kono no gasa ka goddo wakkiloo maayangol neddo moyyo. <sup>8</sup> Kono e nder d'un, Alla banginii giggol mun ngol

fii men: wa fewndo wonnoden junuubankeebe,  
Iisaa Almasiihu on mayno fii men.

<sup>9</sup> Jooni, bay en jogoraama feewube sabu  
yiiyan makko dan, haray ko honno ronkirten  
dandireede tikkere nden sabu makko? <sup>10</sup> Si  
tawii fewndo wonnoden aybe makko kanko  
Alla, o moyyintinirii hakkunde men e makko  
sabu mayde Bisdo makko on, haray ko haa  
honto non dandirteden ngurndan makko dan,  
enen moyyintinidaabe e makko kanko Alla ben!  
<sup>11</sup> Ko beyditii e d'un, hid'en mantorde Alla sabu  
Iisaa Almasiihu Joomi men on, on wondo sabu  
moyyintingol hakkunde men e Alla.

### *Fii Ebbindirgol Aadama e Iisaa Almasiihu on*

<sup>12</sup> Ko dun wadi, ko wano non, sabu aaden  
gooto, junuubu naatiri e aduna on, e sabu on  
junuubu kadi mayde nden ari, ko wano non kadi  
mayde nden rewiri e hoore yimbe ben fow, ko  
fii fow wadii junuubu. <sup>13</sup> Ko fii, haa fewndo  
addegol Sariya on, hari junuubu on no e nder  
aduna on, kono junuubu ndaaretaake si sariya  
alaa. <sup>14</sup> Kono mayde nden laamii gila e \*Aadama  
haa e Muusaa, hay e hoore be wadaano junuubu  
ben wa bonnere Aadama nden, on mo tawata ko  
mbaadi Aroyoowo on. <sup>15</sup> Kono bonnere Aadama  
nden e dokkal Alla ngal wonaa gootun. Si tawii  
buy maayii sabu bonnere aaden gooto, d'un ko  
Aadama, haray ko haa honto non moyyere Alla  
nden, e dokkal iwrungal e moyyere on aaden  
gooto, d'un ko Iisaa Almasiihu on, layirta haa  
heewa e hoore d'uudube! <sup>16</sup> Ko wano non,  
battane junuubu aaden gooto e dokkal Alla ngal

wonaa gootun. Ko fii jaawoore nden bawto junuubu gooto ko addi ko donkineede, e hin-le dokkal ngal bawto bonnereeji duududi ko addi ko jogoreede wa feewube. <sup>17</sup> Si tawii, sabu bonnere aaden gooto, dun ko Aadama, mayde nden laamorii immorde e makko kanko tun, haray ko haa honto hebube moyyere heewunde e dokkal peewal ben laamotoo ka ngurndan, sabu oo gooto, dun ko Iisaa Almasiihu on! <sup>18</sup> Ko dun wadi, si tawii donkinanne bonnere aaden gooto hewtii yimbe ben fow, ko wano non kadi, ko sabu kuugal feewungal gootal, peewal yedsayngal ngurndan ngal hewtiri yimbe ben fow. <sup>19</sup> Nde tawnoo duudube laatike junuubankeebe sabu angal doftaare aaden gooto, dun ko Aadama, ko wano non kadi duudube laatortoo feewube sabu doftaare aaden gooto, dun ko Iisaa Almasiihu on. <sup>20</sup> E hin-le ko Sariya on arani, ko fii yo bonnereeji din beydo. Kono ka junuubu on beydii don, ko don sulfu on beydii beydaadee. <sup>21</sup> Ko wano junuubu on banginiri bawgal mun mayde non, ko wano non kadi sulfu Alla on banginiri bawgal mun ngal peewal nawrayngal e \*ngurndan poomayankejan dan immorde e Iisaa Almasiihu Joomi men on.

## 6

*Fii Maayugol e telen-ma Junuubu, Wuurana Alla e Almasiihu on*

<sup>1</sup> Awa ko hondun wi'eten? En duumoto e wadugol junuubu on fii yo sulfu on beydo?

<sup>2</sup> Pellet hinaa non! Enen, bee maybe e telen-ma junuubu, ko honno non wuuirten e nder

junuubu kadi? <sup>3</sup> E on andaa wonde, enen bee \*lootaabe maande kisiyee e nder humondiral e Iisaa Almasiihu on fow, ko e mayde makko nden tawdadef? <sup>4</sup> Awa, en surridaama e makko ka nder mayde rewrude e looteede maande kisiyee nden, fii, wano \*Almasiihu on imminiraa non e hakkunde maybe ben rewrude e mangu Baabaajo on, enen kadi, yo en wuuru ngurndan kesan. <sup>5</sup> Ko dñun wadi, si en yusbondirii e makko ka mayde makko, pellet en woniray kadi wano non ka immintineede makko. <sup>6</sup> Ko fii hidēn andi ngurndan men kidfan dan fempidaama e makko, fii no ndun bandu junuubankeeru muliree, fii wota en laato hande kadi maccube junuubu. <sup>7</sup> Ko fii kala maydo fuutike bawgal junuubu. <sup>8</sup> Si tawii en maayidii e Almasiihu on, haray hidēn gomdfini wonde en wuuriday e makko. <sup>9</sup> Ko fii hidēn andi wonde Almasiihu on immitike e hakkunde maybe ben, o maayataa hande kadi, mayde nden maraa doole hande kadi e hoore makko. <sup>10</sup> Nden mayde nde o maayi, ko e telen-ma junuubu o maayi, nde wootere ko yoni haa poomaa. Jooni non himo wuuri, ko Alla o wuurani. <sup>11</sup> Onon kadi wano non, jogoree hoore mon wa maybe e telen-ma junuubu, e wa wuuranbe Alla e nder humondiral e Iisaa Almasiihu on.

<sup>12</sup> Awa, wota junuubu laamo balli mon maayaydi din, e wota on dofto himmeeji majji din. <sup>13</sup> Wota on weebitan tere mon den junuubu, wa aala fii angal peewal, kono wattee hoore mon onon tigi e Alla, wa wuurube iwbe e mayde, sakkanodon Alla tere mon den wa aalaaji fii

peewal ngal. <sup>14</sup> Dun, junuubu foolataa on, ko fii hinaa e ley Sariya on wondon, kono ko e ley sulfu on.

*Fii Maccube Peewal ngal*

<sup>15</sup> Jooni non, ko honno? E hara en jokkay wadugol junuubu, bay hinaa e ley Sariya on wonden, kono ko e ley sulfu Alla on? Pellet waawataa wonde! <sup>16</sup> E on andaa, si on wadii hoore mon maccudo goddo fii doftagol mo, haray on wonii maccudo on mo doftidom? Ko si on wonu maccube junuubu nawroowo e mayde, maa si on wonu maccube doftaare nawraynde e peewal. <sup>17</sup> Kono ko yettude Alla, bawto on wonude maccube junuubu on, on doftorii bernde noone jannde nde hewtinadon nden. <sup>18</sup> Bay on jattinaama junuubu on, on wontii maccube peewal ngal. <sup>19</sup> (Ko wano neddanke'en nii mi woni yewtirde, sabu lo'ere balli mon din.) Wano wadirnodon tere mon den wa kurkantoode angal laabal e angal peewal, fii sakkitorogol ka angal peewal, jooni kadi wadiree wano non tere mon den wa kurkantoode peewal ngal fii sakkitorogol laabal ngal.

<sup>20</sup> Ko fii, fewndo wonnodon maccube junuubu, hari on alaa kurkanaade peewal ngal. <sup>21</sup> Ko hondun hebunodon e den kuude de wadunodon, den de tawata hidon hersiri jooni? Ko fii sakkitoode majje on ko mayde. <sup>22</sup> Jooni non, onon jattinaabe junuubu ben, ko on maccube Alla, ko mardon tono ko laabal, sakkitoode nden kadi ko \*ngurndan poomayankejan. <sup>23</sup> Ko fii, njoddi junuubu ko mayde, kono dokkal Alla ngal ko ngurndan

poomayankejan e nder humondiral e Iisaa Almasiihu Joomi men on.

## 7

### *Misal Yettaangal e Dewgal*

<sup>1</sup> E on andaa yo musibbe wonde Sariya on ardoto goddo fannin himo wuuri? (Mido yewtude on wano mi yewtirta yimbe andube Sariya on.) <sup>2</sup> Ko sariya on humindiri debbo yettaado e moodi mun, yeru on no wuuri. Kono si moodi makko maayii, haray on debbo seedii e on sariya humindirnoodo mo e moodi makko. <sup>3</sup> Si tawii non e nder ngurndan moodi makko, o wonii beyngu gorko goo, haray o wontii jeenoowo. Kono si tawii moodibbo on maayii, haray o sendaama e sariya on. Dun, si goddo goo yettii mo, haray hinaa o jeenoowo.

<sup>4</sup> Onon kadi ko wano non, yo musibbe an, on maayii e telen-ma Sariya on wondude e bandu Iisaa Almasiihu on, fii no jeyiredon e goddo goo, on immintinaado e hakkunde maybe ben, fii no wadiren kuude welayde Alla. <sup>5</sup> Ko fii, fewndo jokkunoden mbeleede bandu men ndun, hari faaleeji bondi yaadudi e junuubu immorde e Sariya on no ardotonoo tere men d'en, fawa en kadi kuude nawrayde e mayde. <sup>6</sup> Kono jooni, en seedii e Sariya on, ko fii en maayii e telen-ma kon ko wadunoo en maccube. Ko d'un wadi, jooni hidien kurkorande Alla noone keso tippude e Ruuhu makko on, hara hinaa e oya noone kiddo mo Sariya.

### *Hakkunde Sariya on e Junuubu*

<sup>7</sup> Awa ko hondun wi'eten jooni: Sariya on ko junuubu? Pellet hinaa dfun! Kono ko sabu Sariya on mi andiri junuubu. Ko fii mi andataano ko woni himme si Sariya on wi'aano «wota mo himma!» <sup>8</sup> Onsay junuubu on baarori yamiroore nden, o wadi e an kala noone himme. Ko fii, si Sariya on araano, hanno junuubu on ko maydo. <sup>9</sup> E telen-ma an min, si Sariya on alaano, hanno mido wuuri. Kono bay yamiroore nden arii, junuubu on wuuri, min mi maayi. <sup>10</sup> Onsay yamiroore nawraynde e ngurndan nden nawrimmi ka mayde. <sup>11</sup> Ko fii junuubu on daynimmi baarori yamiroore nden, warimmi. <sup>12</sup> Dun non, Sariya on ko \*seniido, yamiroore nden kadi ko seniinde, feewunde moyyere. <sup>13</sup> Awa hara ko moyyi kon wonanii lan mayde? Pellet oo'o! Kono ko junuubu on, fii yo o feeju junuubu, o wadirii e an mayde rewrude e ko moyyi kon, fii yo junuubu on feenir no laabiri poy junuubu sabu yamiroore nden.

<sup>14</sup> E hoore dfun, hid'en andi wonde Sariya on ko e Alla iwri, kono min, ko mi neddfanke maccinaniido junuubu. <sup>15</sup> Ko fii mi faamaa ko mi woni wadfude kon. Ko mi yidi kon kadi mi alaa wadfude d'un, kono ko ko mi aji kon mi woni waqfude. <sup>16</sup> Si tawii mido wadfude ko mi faalaaka kon, haray mido jabi wonde Sariya on ko moyyo. <sup>17</sup> Jooni non, hinaa min han kadi woni wadfude d'un, kono ko junuubu wondo e an on. <sup>18</sup> Ko fii mido andi wonde ko moyyi kon alaa e an, e maanaa ka bandu an. Ko fii min tigi mido wondi e faale wadugol ko moyyi, kono mi alaa wadfude dun. <sup>19</sup> Mi alaa wadfude moyyere

nde mi faalaa nden, kono mido wadude bone mo mi faalaaka on. <sup>20</sup> Si tawii mido wadude ko mi faalaaka, haray hinaa min tigi hande kadi woni wadude d<sup>u</sup>n, kono ko junuubu wondo e an on.

<sup>21</sup> Awa e hino sariya mo mi tawi on: tuma mi faalaa wadude ko moyyi woo, haray bone on no e an. <sup>22</sup> Ko fii Sariya Alla on no welammi ka bernde, <sup>23</sup> kono mido yi'ude ka tere an sariya goo, wondo dartaade sariya faamu an ngun, wondo lan e wattude maccudo sariya junuubu, wondo e tere an d<sup>en</sup>. <sup>24</sup> Min e tampere an! Hara ko hombo jattintammi e nduu bandu maayooru? <sup>25</sup> Ko yettude Alla, immorde e Iisaa Almasiihu Joomi men on! Ko d<sup>u</sup>n wadi, si ka bernde an ko mi maccudo Sariya Alla on, fii kala ka bandu an ko mi maccudo sariya junuubu on.

## 8

### *Fii Wuurirgol Ruuhu Allaahu on*

<sup>1</sup> Jooni donkinannde woo alanaa b<sup>en</sup> humondirbe e Iisaa Almasiihu on. <sup>2</sup> Ko fii sariya Ruuhu ngurndan wondo e Iisaa Almasiihu on jattinii lan sariya junuubu e mayde on. <sup>3</sup> Ko fii Alla timminii ko Sariya on ronki kon, bay lo'ere neddanke nden mehindinii mo. Alla muncii bawgal junuubu on ka bandu e nder addirgol Bid<sup>d</sup>o makko on bandu nanditayndu e junuubankeeru neddanke ndun. <sup>4</sup> Alla wadiri d<sup>u</sup>n fii no peewal Sariya on timmira e men, enen wonbe jokkude Ruuhu Allaahu on, hara hinaa e mbeleedse bandu.

<sup>5</sup> Ko d<sup>u</sup>n wadi, wuuri<sup>r</sup>be mbeleede bandu b<sup>en</sup> ko fii mayru mijotoo, kono wuuri<sup>r</sup>be Ruuhu

Allaahu on no mijoo fii faale Ruuhu Allaahu on.

<sup>6</sup> Jokkugol mbeleede bandu ko mayde, jokkugol non faaleeji Ruuhu Allaahu on ko ngurndan e buttu. <sup>7</sup> Ko fii mbeleede bandu no apni Alla, bay bandu ndun yankinantaako Sariya Alla on, ko bay non ndu waawataa! <sup>8</sup> Ko fii wonbe e ley mbeleede bandu ndun waawataa welude Alla.

<sup>9</sup> Onon non, on alaa e ley mbeleede bandu han kadi, kono ko e ley faale Ruuhu on, bay Ruuhu Allaahu on no e mon. Ko fii on mo Ruuhu \*Almasiihu on alaa e mun, haray hinaa mo makko. <sup>10</sup> Si tawii Almasiihu on no e mon, haray bandu ndun maayii sabu junuubu on, kono haray ruuhu on no wuuri sabu peewal ngal. <sup>11</sup> E si tawii Ruuhu makko kanko Immintindo Iisaa e hakkunde maybe ben no e mon, haray on Immintindo Iisaa Almasiihu on e hakkunde maybe ben yeday balli mon mayooji din ngurndan immorde e Ruuhu makko Wondo e mon on.

<sup>12</sup> Dun haray, yo musibbe, no woodi ko fawii en, hara hinaa wuuringol mbeleede bandu.

<sup>13</sup> Si tawii ko mbeleede bandu wuuringdon, on maayay. Kono si tawii ko Ruuhu Allaahu on warirdon mbeleede bandu den, on wuurray.

<sup>14</sup> Ko fii kala be Ruuhu Alla on ardi, ko bibbe Alla. <sup>15</sup> Awa Ruuhu mo hebudon on hinaa ruuhu maccangaaku fii wonugol fahin e nder kulol, kono ko Ruuhu Wadudo on bibbe Alla. Immorde e makko kanko Ruuhu on en ewnoto Alla «Abba!», dun ko «Baaba!» <sup>16</sup> Ruuhu Allaahu on tigi no seeditanaade ruuhu men on wonde ko en bibbe Alla. <sup>17</sup> Ko dun wadi, si tawii ko en bibbe makko, haray kadi ko en ronoobe mo kanko Alla, ronidoobe e Almasiihu on, si tawii

e nder haqiiqa hidēn tampidude e makko fii no tawireden e mangural makko ngal.

### *Fii Mangu Aroyoowu ngun*

<sup>18</sup> Mido felliti tampereeji oo saa'i fewndiido foddaa ebbindireede e mangu aroyoowu fejninanoyteengu en ngun. <sup>19</sup> Awa kadi tageefo ngon no habbori no tiisfiri fii fejnineebe bibbe Alla ben. <sup>20</sup> Ko fii tageefo ngon ko e ley bitteende wadaa, hinaa tippude e yidi maggo, kono ko tippude e yidi Wadudo ngo e ley bitteende on, e hoore tanyinagol wonde <sup>21</sup> ngon tageefo tigi jattinte maccangaaku mayde e polugol, ngo heba gebal ka ndimu bibbe Alla darjinngu ngun. <sup>22</sup> Ko fii hidēn andi tageefo ngon fow no woytaade tampere haa hande wa muuseendi ḥata. <sup>23</sup> Ko beyditii e d̄un, enen kadi, bee adiibe hendaade Ruuhu Allaahu on, hidēn woytaade ka berde men e nder ko habbiden haa Alla wađa en bibbe makko, o sotta balli men d̄in. <sup>24</sup> Ko fii ko e nder ndee tanyinaare dandaden. E hin-le si en yi'ii ko tanyiniden kon, haray d̄un wonaa tama'u hande kadi. E hara ko hombo tanyinortoo ko yi'i kon? <sup>25</sup> Kono si hidēn tanyinii ko en yi'aali, haray hidēn habbori d̄un ḥajjaare.

<sup>26</sup> Ko wano non kadi Ruuhu Allaahu on wal-litorta en tuma lo'udfen. Ko fii en andaa ko haanuden toraade Alla e nder torndeeji men d̄in, kono on Ruuhu tigi faaboto en e fee woytaangooji di waawotaako sifaade. <sup>27</sup> Ko fii Lipoowo berde on no andi ko hondun woni miijo Ruuhu mun on, bay ko e yidi Alla, on Ruuhu fattoranta gomdinbe ben.

*Fii Burbe Foolude ben*

<sup>28</sup> Hidesen andi wonde piiji din fow no yaadude fii moyyere ben yidubé Alla, noddiraabe sabu ebboore makko nden. <sup>29</sup> Ko fii, ko ben be o andunoo, ko ben o muuyani nandugol e mbaadi Biddo makko on, fii no on Biddo wonira Afo e hakkunde musibbe duudubé. <sup>30</sup> Ben be o muuyannoo, o noddi be. Ben be o noddi, o jogori be kadi feewube. Ben be o jogori feewube non, o darjini be kadi.

<sup>31</sup> Ko hondun non wi'eten e dun? Si tawii Alla no wonani en, haray ko hombo dartotoo en? <sup>32</sup> On mo salanaaki en Biddo mun Bajjo on, kono o itti mo sadaka fii men en fow, ko honno o ronkirta en okkirde piiji din fow wondude e Biddo on, sabu moyyere makko nden! <sup>33</sup> Ko hombo toopata subaabé Alla ben? Hay gooto, bay ko Alla woni Jogoroowo wa feewudo. <sup>34</sup> Ko hombo donkinta be? Hay gooto, bay ko Iisaa Almasiihu on woni maayunoodo on, e hoore dun o immintinaama, himo ka sengo jaamo Alla, himo tefande en. <sup>35</sup> Ko hombo sendindirta en e giggol Almasiihu on? Hara ko tampereeji din, kaa ko annde nden, kaa ko jokkereeji din, kaa ko heege ngen, kaa ko kolngal ngal, <sup>36</sup> h kaa ko masiibo ngon, kaa ko kaafa kan? <sup>36</sup> Wano windori non: «Nallal ngal fow meden weebitanii mayde fii maa,

men jogoree wa baali hirseteedi!» i

<sup>37</sup> Kono e nder dun fow, ko en foolube, hidse buri foolube kadi, sabu Yidudo en on. <sup>38</sup> Ko fii mido felliti, hinaa mayde nden, hinaa ngurndan

---

h **8:35** 8.35 Maa: «kolndan dan». i **8:36** 8.36 Zab. 44.23

dan, hinaa malaa'ikaabe ben, hinaa mbawdiji  
din, hinaa ko fewndii kon, hinaa ko aroyta kon,  
hinaa doole den, <sup>39</sup> hinaa tagoore nden ka dow,  
hinaa tagoore nden ka ley, hinaa tagu goo kadi  
woo waawata en sendude e giggol Alla wongol e  
Iisaa Almasiihu Joomi men on!

## 9

### *Fii no Alla Subori Jamaa Mun on*

<sup>1</sup> Mido wowlude goonga e nder humondiral  
an e \*Almasiihu on, mi fenataa, fondo an ngon  
no seeditorande lan \*Ruuhu Seniido on: <sup>2</sup> mido  
wondi e sokola tuiufigo e muuseendi duumiindi  
ka bernde. <sup>3</sup> Ko fii mi yeloyto wonugol min tigi  
malkisaadfo, sendee e Almasiihu on fii musibbe  
an ben, dfun ko musical an ngal ka yiyan, <sup>4</sup> ben  
be tawata ko \*Isra'iilayankeeb. Ko kambe Alla  
jogori wa bibbe. Ko ben mangu ngun e \*ahadiiji  
din e Sariya on e dewal ngal e fodaariiji din,  
<sup>5</sup> e maamankaaku Isra'iila'en ngun wonani. Awa  
kadi Almasiihu on ko yiyan mabbe, on Wondo  
Alla e dow kala huunde, mo mantoore wonani  
haa poomaa. Aamiina!

<sup>6</sup> Hinaa fii daaluyee Alla on ko meereejo.  
Ko fii hinaa jurriya Isra'iila ndin fow woni  
Isra'iilayanko. <sup>7</sup> Wonaa jurriya Ibraahiima on  
fow woni bibbe makko, kono no windii: «Ko  
e \*Issaaqa jurriya maa on nodditirtee.» j <sup>8</sup> E  
maanaa, hinaa bibbe ben ka yiyan woni faybe  
Alla, kono ko bibbe fodaari ndin todcaa wonugol

jurriya. <sup>9</sup> Awa e hino kongol fodaari ndin: «E oo saa'i tigi mi aray, Saarata heba biddo.»<sup>k</sup>

<sup>10</sup> Ko beyditii e dfun, Rifqatu siwti dido, be tawata ko oo maamiraawo men wi'eteedo Is-saqa woni ben mabbe. <sup>11-12</sup> Hay fewndo tawnoo faybe ben hebaaka taho, sakko be wada ko boni maa ko moyyi, Alla daalanno Rifqatu wonde: «Ko mawdo on kurkanoytoo tosooko on»,<sup>m</sup> fii no ebboore Alla nden fii subagol tabitira, d'un non wonaa e kuude mabbe den tippi, kono ko e kanko Alla, Noddoowo on, <sup>13</sup> wano no windori non: «Mi yidii Yaaquuba, mi ajii Iisu.»<sup>n</sup>

<sup>14</sup> Ko hondun wi'eten jooni? Hara angal peewal no e Alla? Pellet oo'o! <sup>15</sup> Ko fii himo daalani Muusaa wonde: «Mi yurmete on mo mi faalaa yurminde, mi moyyoo e on mo mi faalaa moyyaade e mun.» <sup>p</sup> <sup>16</sup> Ko d'un wadi, d'un hinaa immorde e faale ned'danke, maa e wakkilaare makko, kono ko immorde e Alla, on Yurmeteedo. <sup>17</sup> Ko fii bindi din no wi'i Fir'awna: «Mi bantii ma tun fii bangingol bawgal an ngal e hoore maa, e fii no innde an nden lolliniree e hoore leydi ndin fow.» <sup>q</sup>

<sup>18</sup> Awa d'un no holli wonde himo yurmina on mo o faalaa, o sattina bernde on mo o faalaa.

<sup>19</sup> Mid'o andi a wi'ay lan: «Bay ko nii, ko hondun Alla feliranta yimbe ben? Ko fii ko hombo waawi dartaade faale makko on?» <sup>20</sup> An non taho, ko hombo wonu-maa ka yeddondiraa e Alla? E hara loonde wi'ay moyyindo nde on: «Ko hondun moyyinirandaa mi nii?» <sup>21</sup> E

---

k **9:9** 9.9 Fud. 18.10      m **9:11-12** 9.12 Fud. 25.23      n **9:13**  
9.13 Mal. 1.2-3      p **9:15** 9.15 Egg. 33.19      q **9:17** 9.17 Egg. 9.16

hara daaloyankeejo waawataa mahirgol loopal no o faaliraa woo, o moyyina ngal loopal gootal loode: wonde nden fii haaju hittudo, ndeya fii haajuhoy tosokoy?

<sup>22</sup> E si tawii, e nder ko Alla faalaa hollude tikkere mun nden e bangingol bawgal makko ngal kon, o munjanike den loode handunooде e tikkere makko nden e nder munjal tiifungal, dun ko den ebbananooде fii hayrannde nden?

<sup>23</sup> E si tawii non o faalaama andinde d'en loode de o yurmaa ngalu darja makko on, d'en de o ebbannoo fii darja makko on, <sup>24</sup> e maanaa d'un ko enen be o noddi ben, hinaa non tun e hakkunde Yahuudiyankeeben, kono kadi e be wonaa Yahuudiyanke ben? <sup>25</sup> Wano o daaliri non ka deftere oo wi'eteedo Husaa'a:

«On mo wonaano jamaa an, mi nodday mo jamaa an,  
on mo wonaano kadi gido an, mi nodday mo gido an»,

<sup>26</sup> e: «Ka be wi'anoo d'on tigi: ‹hinaa on jamaa an!›

ko d'on be noddoytee bibbe Alla Wuurudo on.»  
<sup>p</sup>

<sup>27</sup> Isaaya\* kadi no wi'i fii Isra'iilayankeebe ben:  
«Nde adadu Isra'iilayankeebe ben d'uudiroyi wa

njaareendi ndin ka baharu,

ko heddiibe seedaabe tun dandetee,

<sup>28</sup> ko fii Joomiraado on laatinay kongol jaawoore mun nden ka hoore leydi no yaawiri haa timma!» <sup>q</sup>

**29** Wano Isaaya wiirunoo non:  
 «Si tawno Joomiraado Jom Bawde on accanaano  
 en jurriya,  
 hanno en wa'iino wa dfee ca'e didi, dun ko  
 \*Saduuma e Amuura!» r

*Fii Angal Gomdfinal Isra'iilayankeebe ben*

**30** Ko hondun non wi'eten jooni? Be wonaa Yahuudiyanke, be dabbataano peewal ngal ben, be hebii peewal, ngal peewal iwrungal e gomdfinal ngal. **31** E hin-le Isra'iilayankeebe, dabbaynoobe peewal iwrungal e Sariya on ben, be laatinaano wadfugol ko Sariya on yamiri kon fow. **32** Fii hondun? Ko fii Isra'iilayankeebe ben hinaa gomdfinal dabbiraynood peewal ngal, kono ko wa si tawii ko kuude den peewal heborta. Be bubbii e hayre fegginaynde nden, **33** wano windori non:

«Mido tippinde ka hoore Fello \*Siyuuna hayre fegginaynde,  
 e fetere libaynde.  
 Kala gomdfindo e makko hersinoytaake.» s

## 10

**1** Musibbe an, faale bernde an nden, e ko mi woni toraade Alla fii \*Isra'iilayankeebe ben, ko yo be dande. **2** Kono mido seeditanaade be dundoo: hibe himmani fii Alla, kono hinaa tippude e gandal. **3** Bay be andaali peewal iwrungal e Alla ngal, e bay be dabbii no be tabintinira peewal mabbe ngal kambe tigi, be ronki yankinanaade peewal Alla ngal. **4** Ko fii,

ko \*Almasiihu on woni timmoode Sariya on fii no kala gomdfindo hebira peewal.

<sup>5</sup> Ko dun wadi, Muusaa no windi fii peewal iwrungal e Sariya on ngal, o wi'i: «Kala doftiido dee yamirooje, o wuuiray de.»<sup>t</sup> <sup>6</sup> Kono e hino ko peewal iwrungal e gomdfinal ngal wi'i kon: «Wota a mijo ka bernde maa: <ko hombo yawata ka kammu?» » (dun haray ko tippingol Almasiihu on), <sup>7</sup> «maa: <ko hombo tippotoo ka \*gaygii ngii alaa kattudi ngin?» » (dun haray ko suutugol Almasiihu on e hakkunde maybe ben). <sup>8</sup> Awa ko hondun bindi din wi'i? Ko: «Daaluyee on no takko maa, d'fun ko ka nder hunduko maa e ka bernde maa.»<sup>u</sup> On-le ko daaluyee gomdfinal ngal, on mo men woni yottinde <sup>9</sup> wonde: si a qirritorii hunduko maa kon ko Iisaa woni Joomi on, e si a gomdfinii ka bernde maa wonde Allaahu on immintinii mo e hakkunde maybe ben, a dandete. <sup>10</sup> Ko fii ko bernde nden gomdfinirtee, ontigi jogoree wa feewudo, ko hunduko kon qirritortee, ontigi dandee. <sup>11</sup> Wano bindi din wi'iri non: «Kala gomdfindo e makko hersinoyaake.»<sup>w</sup> <sup>12</sup> Awa, alaa ko sendindiri Yahuudiyanke e be wonaa Yahuudiyanke, be fow ko Joomiraado gooto be mari, on Alfando kala jantiido mo. <sup>13</sup> Ko fii: «Onsay kala jantotoodo innde Joomiraado on dandoyte.»<sup>y</sup>

<sup>14</sup> Ko honno non be jantoroya innde on mo be gomdfinaali? E ko honno be gomdfinirta on mo be nanaali fii mun no wowlee? E ko

---

<sup>t</sup> **10:5** 10.5 Lew. 18.5    <sup>u</sup> **10:8** 10.6-8 Yap. 30.12-14    <sup>w</sup> **10:11**  
10.11 Isa. 28.16    <sup>y</sup> **10:13** 10.13 Yul. 3.5

honno be nanirta fii makko no wowlee e baawo waajotoodo? <sup>15</sup> E ko honno be waajorta si be imminaaka? Ko fii no windii: «Emba teppe yottinoobe Kibaaru Moyyo on no labaa!»<sup>y</sup>

<sup>16</sup> Kono hinaa fow doftii Kibaaru Moyyo on. Bay Isaaya wi'uno: «Joomiraado, ko hombo gomdfini waaju amen ngun?»<sup>z</sup> <sup>17</sup> Ko d'un wadi, gomdfinal ko e nanugol iwata, ko nanetee kon kadi ko e kongol Almasiihu on iwi. <sup>18</sup> Kono mi wi'i: hara be nanaali? Oo'o:  
«Hito kammuuli d'in yahii e leydi ndin fow,  
e kongud'i majji d'in yottoyike haa ka kattudi leydi.»<sup>a</sup>

<sup>19</sup> Kono mi wi'i: e hara Isra'iilayankeebe ben faamaali d'un? Ko Muusaa adii wi'ude wonde Allaahu on daalii:

«Mi nawliniray on be wonaa jamaa tigi,  
mi moninira on jamaa mo alaa faamu.»<sup>b</sup>

<sup>20</sup> Awa Isaaya hebuno cuucal haa o wi'i wonde Allaahu on daalii:

«Be alaa lan d'sab'bude ben hebii lan,  
mi feenani be alaano landaade fii an ben.»<sup>c</sup>

<sup>21</sup> Kono e telen-ma Isra'iilayankeebe ben, o daali:  
«Nallal ngal fow mido fontande juude an d'en  
jamaa murtudo yeddi.»<sup>d</sup>

## 11

*Seedee fii Allaahu on Bugitaaki Jamaa Isra'iila on*

---

<sup>y</sup> **10:15** 10.15 Isa. 52.7    <sup>z</sup> **10:16** 10.16 Isa. 53.1    <sup>a</sup> **10:18**  
10.18 Zab. 19.5    <sup>b</sup> **10:19** 10.19 Yaj. 32.21    <sup>c</sup> **10:20** 10.20 Isa.  
65.1    <sup>d</sup> **10:21** 10.21 Isa. 65.2

<sup>1</sup> Awa mido landoo: e hara Alla bugitike jamaa mun on? Pellet oo'o! Ko fii min kadi ko mi \*Isra'iilayankeejo, jurriya Ibraahiima, ko mi jeyaado e oo bolondaa \*Buniyamiinu. <sup>2</sup> Alla bugitaaki jamaa makko mo o andunoo ko adii fow. E on andaa ko bindi din wi'i kon ka cortewol ka Iiliya wullitii e Alla don e hoore Isra'iilayankeebe ben? <sup>3</sup> O wi'i: «Joomiraado, be warii annabaabe maa ben, be waylitii layyordse maa den! Jooni ko min tun lutti, awa kadi hibe dabb'a no be ittirammi e oo aduna!»<sup>d</sup> <sup>4</sup> Ko hondun woni jaabannde Alla nden? O daali: «Mido maritori yimbe guluuje njeedido, be sujjanaali sanamuuru wi'eteendu \*Balu ndun.»<sup>e</sup> <sup>5</sup> Ko wano non kadi e oo saa'i fewndiido, no woodi heddiibe be Alla subori sulfu mun on. <sup>6</sup> Si tawii non ko sulfu on o subori be, haray hinaa rewrude e kuude den hande kadi. Si hinaa d'un, haray sulfu on wonaa sulfu. <sup>7</sup> Awa ko hondun? Ko Isra'iilayankeebe ben dabbaynoo kon be hebaali, kono subaab'e ben hendike d'un. Beya, berde mun den sattinaa, <sup>8</sup> wano windori non:

«Alla yedii be hakkillaaji daaniidi,  
e gite de yi'ataa,  
e noppi di nanataa,

haa weetaango hande ngoo.»<sup>f</sup>

<sup>9</sup> Daawuuda kadi wi'i:  
«Yo ndadfsule ka be naamata don  
wonan be pircol e ngantan,  
e peggal e njoddi kuude!

<sup>d</sup> 11:3 11.3 1Lam. 19.10  
11.8 Yaj. 29.3 e Isa. 29.10

<sup>e</sup> 11:4 11.4 1Lam 19.18

<sup>f</sup> 11:8

<sup>10</sup> Yo gite mabbe den nibbitu haa tawa be yi'ataa,  
e yo be laato saa'i kala turiibe!»g

*Misal Yettaangal e Caldī Tokkaadī*

<sup>11</sup> Awa mido landoo: Bay be feggike, be yanuno, ngal be immotaako? Pellet oo'o! Kono ko sabu bonnere mabbe nden kisiyee on yediraa be wonaa Yahuudiyanke ben fii memmingol nawliigu Isra'iilayankeebe ben. <sup>12</sup> E hin-le, si tawii bonnere mabbe nden ko ngalu oo aduna, e si tawii fadfannde mabbe nden ko ngalu be wonaa Yahuudiyanke ben, haray ko ittiri ngalu hongu beydotoo ka tawdegol mabbe e kisiyee on. <sup>13</sup> Awa mi andinii on, onon be wonaa Yahuudiyanke ben, min oo \*sahaabaajo fii be wonaa Yahuudiyanke ben, min mido teddini fii golle an den, <sup>14</sup> fii, si tawii no gasa, memmingol nawliigu e hakkunde lenol an ngol, e dandugol wobbe ben. <sup>15</sup> Si tawii wadeede mabbe sera addii moyyintingol hakkunde aduna on e Alla, ko hondun artireede mabbe nden wonoyta si hinaa immintineede ka mayde? <sup>16</sup> E hin-le, si tawii bireediije arane den ko Alla wonani, haray farin piyaado on men. Si tawii kadi dadol ngol ko Alla wonani, haray caldi din men.

<sup>17</sup> Si tawii non goddi e caldi din saltaama, e an non, ki \*zaytuunihi buruurehi, a tokkaama batte majji, haa tawii a tawdaama e dadol ngol e endan zaytuuni dan, <sup>18</sup> wota a mantor caldi din. Si tawii a mantoray, andu tun wonde hinaa an jogii dadol ngol, kono ko dadol ngol jogi-maa.

<sup>19</sup> Haray ko wi'ataa: «Caldī saltaama fii min yo mi tokke.» <sup>20</sup> Andaa fota wonde ko dī tayiraa ko angal gomdfinal majji on. An, a sinjorii dōn sabu gomdfinal maa ngal. Awa wota a mawnintino, kono hulu. <sup>21</sup> Ko fii, si Allaahu on accaali caldi ko ngal wondunoo kon, an kadi o accataa ma.

<sup>22</sup> Awa anditu fii moyyere Alla nden e yagginannde makko nden, yagginannde makko nden e hoore yanube ben, e moyyere Alla nden e hoore maa, si a duumike e nder nden moyyere. Si hinaa d'un, an kadi, a soppete. <sup>23</sup> Kambe kadi wano non. Si be duumaaki e angal gomdfinal ngal, be tokkete, ko fii Alla no mari bawgal tokkugol be kadi. <sup>24</sup> Si tawii an a soppaama e zaytuunihi buruurehi, a tokkaama e zaytuunihi tutaaki, woopondirki e mbaadi maa ndin, ittii e sikke si kambe be tokkete e mbaadi mabbe ndin, e zaytuunihi mabbe kin tigi.

### *Fii no Jamaa Isra'iilayanko on fow Dandirtee*

<sup>25</sup> Ko fii, yo musibbe an, mi yidaa yo on ronku andude oo gundoo doo fii wota on sikku hidon mari faamu feyyitungu: sattere bernde no e hoore wobbe e jamaa Isra'iilayankeeben haa yero ko timmi e be wonaa Yahuudiyankeben naata. <sup>26</sup> Ontuma non Isra'iilayanko fow wonay dandaabe, wano windori non:

«Jattinoowo on iわray \*Siyuuna,  
o pottina e bolondaa Yaaquuba on kala ko  
yaadaa e faale Alla on.

<sup>27</sup> Ko d'un wonoyta \*ahadi an ndin hakkunde an  
e mabbe

nde mi booroyi junuubaaji mabbe din.»<sup>h</sup>

<sup>28</sup> E telen-ma Kibaaru Moyyo on, ko be aybe sabu mon, kono e telen-ma subeede nden, ko be yibbe Allaahu on sabu baabiraabe mabbe ben. <sup>29</sup> Ko fii, dokke Alla den e noddaandu makko ndun hinaa ko jabitotoo. <sup>30</sup> Hari on doftanooki Alla, kono jooni on hebirii yurmeende sabu angal doftaare Yahuudiyankeebé ben. <sup>31</sup> Ko wano non jooni, kambe kadi be wontiri be doftotaako Alla fii no be hebiroya yurmeende nden kambe kadi, sabu yurmeende nde wadananfon nden. <sup>32</sup> Ko fii Alla dumbii yimbe ben fow e nder geddi fii no o yurmiree fow.

### *Mantoore fii Alla*

<sup>33</sup> Ko haa honto ngalu Alla ngun  
e faamu makko ngun e gandal makko ngal luggi!  
Hay gooto waawataa sifaade jaawooje makko  
den,

hay gooto waawataa andude ebbooje makko  
den!

<sup>34</sup> Ko fii ko hombo andi miijo Joomiraado on,  
maa ko hombo woni wajotoodo mo on,

<sup>35</sup> ko hombo adii mo okkorde, si o yobita mo?

<sup>36</sup> Ko fii fow ko immorde e makko,  
tippude e makko, e fii makko.

Ko kanko mangu wonani haa poomaa. Aamiina!

## 12

### *Fii Sadaka Wuurudo*

<sup>1</sup> Awa mi wakkilinii on, yo musibbe an, sabu yurmeende Alla nden, okkitirgol balli mon din

---

<sup>h</sup> **11:27** 11.26-27 Isa. 59.20-21, 27.9 e Yer. 31.33-34

wa sadaka wurdo laabudo, weloowo mo, ko d'un wonanoyta on dewal haanungal. <sup>2</sup> Wota on jembu aduna fewndiido on, kono wonee waylaabe, be hakkillaaji mun heysintinaa, fii no andiron ko hondun woni faale Alla on: d'un ko ko moyyi kon e ko welata mo kon e ko timmi kon.

<sup>3</sup> Tippude e moyyere nde o yedimmi nden, mi wi'ay kala e mon wota o miijo himo hitti haa feyyiti, kono yo o miijito fii hoore makko wano haaniri non, mo kala embere gomdfinal ngal Alla yedi d'un ngal. <sup>4</sup> Wano tawiri non hid'en mari tere buy e nder bandu wooturu, awa kadi tere c'en fow hinaa golle goote mari, <sup>5</sup> d'un non, fii kala hid'en c'uudi, en fow ko en bandu wooturu e nder humondiral e \*Almasiihu on, en fow ko en tere jogondirde. <sup>6</sup> Kono hid'en mari dokke seedude, wano Alla yedfiri mo kala e men moyyere non. Si tawii ko dokkal haalugol ko Alla longini d'un, yo taw ko ko yaadi e gomdfinal. <sup>7</sup> Si ko dokkal fii wallugol, yo o wallu, si ko dokkal jannugol, yo o jannu. <sup>8</sup> Mo no mari kadi dokkal wakkilingol, yo o wakkilin. On mardo kadi dokkal okkugol, yo o okkir no yaajiri. On mardo dokkal ardagol kadi, yo o ardor no keldfiri. On mardo dokkal yurmeende kadi, yo o wadfir d'un weltaare.

### *Fii Giggol Sellungol ngol*

<sup>9</sup> Yo giggol ngol wonu sellungol. Anon ko boni kon, humodon no tiidiri e ko moyyi kon. <sup>10</sup> Yidsindiron giggol sidfankaaku, mo kala e mon jogitora oya wa burdo d'un teddude. <sup>11</sup> Wakkilon don hara on aamaali, kurkoranon

Joomiraado on berde mon den fow. <sup>12</sup> Weltee e hoore tanyinagol, ḥajnjodon tampereeji din, duumodon e toraare Alla. <sup>13</sup> Faaboron gomdinbe ben ko be handi kon, newanodfon wernugol.

<sup>14</sup> Du'anodfon cukkotoobe on ben, du'ee, wota on hudu. <sup>15</sup> Weltodee e ben wonbe weltaade, wullidon e wonbe wullude ben. <sup>16</sup> Mijondiranee mijo wooto, wota on mawnintino, kono jabon jippinde hoore mon. Wota on wadu hoore mon faamuße. <sup>17</sup> Wota on yobitir gooto bone bone. Wadee ko yimbe ben fow ndaarata tawa no moyyi. <sup>18</sup> Si tawii no gasa, yeru hidon waawi, wondee e yimbe ben fow e nder buttu. <sup>19</sup> Wota on yottano hoore mon onon tigi, yo yiдаabe an, kono accee tikkere Alla nden yottoo, ko fii no windii: «Joomiraado on wi'i: Ko min yottannde wonani, ko min woni Yoboowo.»i <sup>20</sup> Ko fii no windii kadi:

«Si gano maa no weelaa, okkor mo, o jaama, si himo dondaa, okkor mo, o yara.

Ko fii warrugol non,  
haray no wa'i wa si ko yulbe yiite moobudaa ka  
hoore makko.»j

<sup>21</sup> Wota bone foolu on, kono fooliree bone on moyyere.

## 13

### *Fii Yankinanagol Laamu ngun*

<sup>1</sup> Yo kala neddo yankinano laamuji din, ko fii alaa laamu ngu tawata hinaa e Alla iwri, ko fii laamuji woodudi din, ko Alla joddfini di. <sup>2</sup> Ko

---

i **12:19** 12.19 Yaj. 32.35

j **12:20** 12.20 Tin. 25.21-22

dun wadfi, kala on dartiido laamu ngun, haray dartike yamiroore Alla nden, ben dartiibe non, haray fawii hoore mun jaawoore. <sup>3</sup> Laamiibe ben hulbinaaki si tawii ko ko moyyi wonaa wadeede, kono ko si tawii ko ko boni. Si a faalaaka hulude laamu ngun, wadu ko moyyi, dun a hebay kuluujaa maggu on. <sup>4</sup> Ko fii ko kangu woni kurkaadu Alla fii nafa maa kan. Kono si hida wadude ko boni, haray wonu e nder kulol, bay hinaa meere ngu jogori kaafa, ko fii ko kangu woni kurkaadu Alla fii yottingol tikkere makko nden e hoore on wadoowo ko boni. <sup>5</sup> Awa jaka yankinanagol laamu ngun no hitti, hinaa fii nden tikkere tun non, kono kadi ko sabu bernde ontigi nden. <sup>6</sup> Ko sabu d'un kadi hidon yoba sagalle, ko fii laamiibe ben ko liggantoobe Alla, duumiibe e wadugol den golle no moyyiri. <sup>7</sup> Jonnitee mo kala ko handi kon, jonniton sagalle den on mo haanudon jonnude, hulon on mo haanudon hulude, teddinon on mo haanudon teddinde.

### *Fii Yidindirgol*

<sup>8</sup> Wota jamaande woo wonu hakkunde mon e goddo si wonaa yidindirgol, ko fii kala yifudo wondibbe mun ben, haray timminii Sariya on. <sup>9</sup> Ko fii yamirooje den, d'un ko «wota mo jeena», «wota mo itta hoore», «wota mo wujja», «wota mo seeditoo fenaande», «wota mo himmana ko goddo jeyi», e deya yamirooje fowk no noggaa e nder ngol daalol doo: «Yo a yidsir nokondo maa on wano yidsirfaa hoore maa non.»<sup>m</sup> <sup>10</sup> Giggol

---

k **13:9** 13.9a Egg. 20.13-17      m **13:9** 13.9b Lew. 19.18

wadataa nokondo mun ko boni, awa jaka ko  
giggol woni timmoode Sariya on.

<sup>11</sup> Bay hidon andi ko e saa'i hombo wonden,  
awa immee, hinaa saa'i d̄aanagol nii! Ko fii  
jooni kisiyee on burtii en battaade edii fewndo  
arden e gomdinde. <sup>12</sup> Jemma on muutike, badike  
weetude, awa bortoden kuudse niwre nden,  
bornoden aalaaji ndaygu ngun. <sup>13</sup> Wuuriren no  
fewiri, wa tumbere palorma, e baawo \*fasaadu  
e mandilugol e jinaa e jiibaare e yeddondiral  
e nawliigu. <sup>14</sup> Kono bornodon Iisaa Almasiihu  
Joomi men on, hara on d̄abbaali mbeleedse  
bandu fii weltingol himmeeji.

## 14

### *Fii Hakkunde Tiidube e be Tiidaa Gomfinal ben*

<sup>1</sup> Jabee on mo tiidaa gomfinal e baawo feloore.  
<sup>2</sup> Goddo on no sikka no waawi jaamude ko  
woni woo, oya mo tiidaa gomfinal kadi ko bibbe  
naakoo tun jaamata. <sup>3</sup> On jaamoowo ko woni  
woo, wota piiddin few mo jaamataa ko woni woo  
on. On mo jaamataa kadi, wota felu jaamoowo  
on, ko fii Alla no jabi mo kala. <sup>4</sup> Ko hombo wonu-  
maa an, oo feloowo kurkaadu goddo goo? Si  
tawii himo darii maa si himo yani, d̄un ko jeydo  
mo on wonani. Kono o daroto, ko fii Joomiraado  
on no mari bawgal tambitagol mo.

<sup>5</sup> Wobbe no wi'i wonde jalaade den no burdi,  
wobbe ben no jogitii de fow hide fota. Awa yo  
mo kala hoolor ko mijjii kon. <sup>6</sup> On mo burdindini  
jalaade d̄en, haray ko fii teddingol Joomiraado  
on o wadiri d̄un. On mo no jaama kadi, haray ko

fii teddingol Joomiraado on o woni jaamande, ko fii himo jarnude Alla. On mo alaa jaamude, haray ko fii teddingol Joomiraado on hadi o jaama, ko fii kanko kadi himo jarnude Alla. <sup>7</sup> Ko dñun wadí, hay gooto e men alaa wuurplende hoore mun tigi, e hay gooto alaa maayande hoore mun tigi. <sup>8</sup> Ko fii si en wuuru, haray ko Joomiraado on wuurplenden, si en maayu, haray ko Joomiraado on maayanden. Woni en wuuru maa en maayu, ko Joomiraado on jeyi en. <sup>9</sup> Ko dñun wadí si \*Almasiihu on maayi, o immitii, fii wonugol Jom maybe ben e wurbe ben. <sup>10</sup> Kono an, ko hondun felantaa musidđo maa on? Maa an, ko hondun niddinantaa musidđo maa on? Ko fii en fow en daroyto yeeso jaawoore Alla nden. <sup>11</sup> Ko fii no windii wonde, Joomiraado on no daali:

«Fodde ko goonga mido wuuri,  
kala howru jiccoto yeeso an,  
kala dñengal mantay Alla.»<sup>n</sup>

<sup>12</sup> Ko dñun wadí, mo kala e men qirritoto yeeso Alla fii hoore mun tigi. <sup>13</sup> Awa, wota en jaawindir hande kadi, dñun-le wuren ardinee hakkil, fii wota on wadu yeeso musidđo mon on hayre fegginaynde maa wonon sabu yanal. <sup>14</sup> Mido andi, mido felliti e nder humondiral an ngal e Iisaa Joomi on, huunde alaa ko tuunani hoore mun, kono si godđo no miijii wonde godđun laabaa, haray dñun laabanaa mo. <sup>15</sup> Si tawii musidđo maa aanii sabu ko jaamataa kon, haray a woniraa giggol hande kadi. Wota ko jaamataa kon wonu sabu hayrannde on mo

---

<sup>n</sup> **14:11** 14.11 Isa. 45.23

Almasiihu on maayi fii mun. <sup>16</sup> Wota ko moyyani on kon wowlire wa ko boni. <sup>17</sup> Ko fii \*laamu Alla ngun hinaa jaametee maa njaram, kono ko peewal e buttu e weltaare ko \*Ruuhu Seniido on yedata kon. <sup>18</sup> On mo kurkorani nii Almasiihu on, haray no wela Alla, no mari kadi teddungal yimbe ben.

<sup>19</sup> Awa dabbən ko beydata buttu e ko tiidinta hakkundeeji men e nder gomdfinal ngal. <sup>20</sup> Wota a bonnir golle Alla dən jaametee. Ka haqiiqa, jaameteeji din fow no laabi, kono moyyanaa neddo ka o jaama godsfun ko wonata sabu feggingol goddo. <sup>21</sup> No moyyani goddo hara o jaamaali teewu, o yaraali njaram mandilinaydan, maa wadugol kala ko fegginta musicdo mun. <sup>22</sup> Ngal gomdfinal ngal mardaa, maru ngal fii maa yeeso Alla. Maloore wonanii on mo fawaali hoore mun jaawoore e nder anniyeji mun. <sup>23</sup> Kono on jaamudo ko sikkitii, haray fawtike jaawoore, ko fii dfun hinaa e gomdfinal ngal iwri. Ko fii kala ko iwraa e gomdfinal ngal, haray ko junuubu.

## 15

<sup>1</sup> Enen tiidube e gomdfinal ben, hidən haani tambitaade lo'ereeji ben be tiidaa ka gomdfinal, e wota en dabbu ko welata en kon. <sup>2</sup> Yo mo kala e men weltinir nokondo mun on ko moyyi fii tiidingol mo ka gomdfinal. <sup>3</sup> Ko fii \*Almasiihu on dabbəaano ko welata mo kon, kono wano bindi din holliri non: «Hoyreeji wonbe ma hoynude ben yanii e hoore an.»<sup>n</sup> <sup>4</sup> E hin-le ko

---

<sup>n</sup> **15:3** 15.3 Zab. 69.9

adanoo windeede kon fow wonanii en jannde,  
fii no hebiren tama'u on sabu ηajnaare nden e  
wakkilaare iwrunde e bindi din.

<sup>5</sup> Yo Alla, Jom ηajnaare nden e Jom wakki-laare nden, yedu on wonugol miijo wooto, e  
nder jokkugol misal Iisaa Almasiihu on, <sup>6</sup> fii no  
mawniniron Alla, on Ben Iisaa Almasiihu Joomi  
men on, e nder nanondiral e kongol gootol.

<sup>7</sup> Jabbondiree no moyyiri, wano Almasiihu on  
jabbori on non, fii mangu Alla ngun. <sup>8</sup> Ko mi  
woni wi'ude, ko Almasiihu on wonii kurkaadu  
Yahuudiyankeeben fii bangingol goonga Alla  
on, e nder haqingingol fodaariiji wadanaadi  
baabiraabe ben, <sup>9</sup> fii no be wonaa Yahuudiyanke  
ben mawninira Alla fii yurmeende makko nden,  
wano windori ka Zabuura non:  
«Mi mantete e hakkunde leyyi din,  
mi beyta fii teddingol innde maa nden.»<sup>η</sup>

<sup>10</sup> No windii ton kadi:  
«Ko onon, yo leyyi, weltodee e jamaa makko  
on!»<sup>p</sup>

<sup>11</sup> No windii ton kadi fahin:  
«Onon leyyi din fow, jarnee Joomiraado on,  
awa kadi yo jamaaji din fow mantu mo!»<sup>q</sup>

<sup>12</sup> Isaaya kadi no wi'i:  
«Geeyol Yassaa'u ngol feejoyay,  
ko ngol immoytoo fii ardagol leyyi din,  
leyyi din tanyinora ngol.»<sup>r</sup>

<sup>13</sup> Yo Alla, Jom tama'u on, hebbin on weltaare e  
buttu fow e nder gomdin ngal, fii no heewiron

---

<sup>η</sup> 15:9 15.9 2Sam. 22.50 e Zab. 18.50      p 15:10 15.10 Yap.  
32.43      q 15:11 15.11 Zab. 117. 1      r 15:12 15.12 Ko Yassaa'u  
woni ben Daawuuda. Isa. 11.10

tanyinaare immorde e bawgal \*Ruuuhu Seniido on.

*Fii Golle Puulusa den*

<sup>14</sup> E telen-ma mon, yo musibbe an, min tigi mido felliti hidon heewi moyyere e faamu timmungu, e hicton waawi waajondirde. <sup>15</sup> Ko dun wadi, e nooneeji goo mi windiranii on cuucal, fii andintingol on tobbe goo de jan-gunodon, sabu moyyere nde Alla wadanimmiden <sup>16</sup> wonangol Iisaa Almasiihu on kurkaadu fii be wonaa Yahuudiyanke ben, e nder ko Alla tod'sii mi kon fii Kibaaru Mooyo makko on, fii no be wonaa Yahuudiyanke ben wonirana mo sadaka weloowo mo, labbiniraado\* Ruuhu Seniido on.

<sup>17</sup> Sabu humondiral an e Iisaa Almasiihu on, mido waawi mantorde golle de mi woni gollande Alla den. <sup>18</sup> Ko fii mi suusataa wowlude si wonaa ko Almasiihu on wadiri e an kon fii addugol be wonaa Yahuudiyanke ben doftorgol Alla kongol e kuugal, <sup>19</sup> tippude e doole maandeeji e kaawakeeji moyyi e bawgal Ruuhu Alla on. Ko wano non, gila \*Yerusalem mi taarori non haa hewti Iliriiya, mi yottini Kibaaru Mooyo Almasiihu on fow. <sup>20</sup> Awa anniye an on ko fenjingol Kibaaru Mooyo on nokku ka tawata Almasiihu on andaaka, fii wota mi darnu e hoore didol god'sdo. <sup>21</sup> Kono wano windori non:

«Ben be fenjinananooka yi'oyay,  
e ben be nanaano kadi faamoyay.»<sup>s</sup>

<sup>22</sup> Ko d'un wonnood mi hadude soono woo yahugol ka mon.

*Ebbooje Puulusa den fii Yahugol Roomu*

<sup>23</sup> Kono jooni mi gaynii golle an den e dii nokkeeli. Gila duubi buy mido faalanoo yahude ka mon. <sup>24</sup> Nde mido yaha Espaani, mido tanyinii yiidugol e mon e nder ko mi rewata don kon, mi weltora wondugol e mon seeda. Onsay, wallon mi no yahugol e ndin leydi neworanammi. <sup>25</sup> Fewndo doo mido yahude Yerusalaam fii kurkanagol yimbe Alla ben. <sup>26</sup> Ko fii be Masedonii ben e be Akaaya ben no faalaa moobindirde godfun e nder jawle mabbe den fii miskinbe wonbe e hakkunde yimbe Alla ben Yerusalaam. <sup>27</sup> Awa, hibe weltori wadfugol d'un, bay hibe haani be wadande. Ko fii, si be wonaa Yahuudiyanke ben hebirii barkiji Alla din sabu Yahuudiyankeeben, kambe be wonaa Yahuudiyanke ben kadi hibe haani be wallirde keyeeji aduna. <sup>28</sup> Si mi gaynii jonnude ko moobindiraa kon haanube hendaade ben, mi rewoyay ka mon, nde mido yaha Espaani. <sup>29</sup> Mido andi, nde mido yaha ka mon, mi yaaday e barki timmuki Almasiihu on.

<sup>30</sup> Mi wakkilinii on sabu Iisaa Almasiihu Joomi men on yo musibbe an, e sabu giggol Ruuhu Alla on, dartodugol e an e nder fewtingol Alla toraaje fii an, <sup>31</sup> fii no mi hettora e juude yeddube wonbe ka diiwal \*Yahuuda ben, e fii no gomfinbe ben jabira dokke, de mi nabata Yerusalaam den, no moyyiri. <sup>32</sup> Dun, mi hewtiday ka mon e weltaare, si tawii ko d'un woni faale Alla on, hara en fow en heyfintinoday. <sup>33</sup> Yo Alla Jom buttu on wondu e mon on fow. Aamiina!

# 16

## *Fii Salminande den ka Rawnoode*

<sup>1</sup> Mi halfinii on oo bandiraawo men wi'eteedo Fibii, wallitotoodo ka \*moftal wongal Kenkere,  
<sup>2</sup> fii no jaabboron mo e innde Joomiraado on, e noone no haanirani gomdfinbe ben. Wattitodon e juude makko fii kala huunde nde haaju makko yanoyi e mon, ko fii o wallitike duudube, min kadi men o wallitike lan.

<sup>3</sup> Hiwranee lan Piriskiila e Akiila, ben wondibbe an e golle e nder humondiral e Iisaa Almasiihu on, <sup>4</sup> ben weebitube ngurndan mun fii hiwugol ngurndan an d'an. Hinaa min tun non weltanii be, kono ko mofte be wonaa Yahudiyanke ben fow kadi. <sup>5</sup> Salminanee lan kadi moftal wongal ka suudu mabbe ngal. Salminanon mi kadi oo gido an wi'eteedo Apayniiti, on adiido gomdfinde \*Almasiihu on e hakkunde be \*Aazii ñen. <sup>6</sup> Salminanon mi Mariyama, on gollannoodo on fota. <sup>7</sup> Salminanon mi kadi Andoroniiki e Yuniyaasi, d'un ko bee musibbe an e wondibbe an ka kaso, d'un ko ben be \*sahaabaabe ben hoolii fota, adiibe lan jeyeede e Almasiihu on. <sup>8</sup> Salminanon mi kadi Ampiliyaasi, on gido an e nder humondiral e Joomiraado on. <sup>9</sup> Salminanon mi kadi Urbaanu, d'un ko oo wondiddo men e golle e nder humondiral e Almasiihu on, e oo gido an wi'eteedo Astakiisi. <sup>10</sup> Salminanon mi kadi Apeliisi, on mo gomdfinal mun e Almasiihu on seeditaa fii mun. Salminanon mi bee jeyaabe e nduu suudu oo wi'eteedo Aristobuulu. <sup>11</sup> Salminanon mi oo musiddo an wi'eteedo Herodiyuna.

Salminanon mi kadi bee jeyaabe e nduu suudu oo wi'eteedo Narkiisu, humondirbe e Joomiraado on. <sup>12</sup> Salminanon mi kadi Tarifayna e Tarifuusa, d'un ko bee rewbe gollanoobe Joomiraado on. Salminanon mi kadi Persiisa, gido an on, on kadi gollanii Joomiraado on fota. <sup>13</sup> Salminanon mi kadi Rufuusa, oo subaad o Joomiraado on. Salminanon mi kadi yumma makko, on mo tawata kadi ko yumma an. <sup>14</sup> Salminanon mi kadi Asinkiriiti e Filiguuna e Hermiisi e Patrobaasi e Hermasa e musibbe wondube e mabbe ben fow. <sup>15</sup> Salminanon mi kadi Filolooge e Yuliya e Niriyuusa, wondude e bandiraawo makko on, e Olimpaasi e wondibbe mabbe gomdinbe ben fow. <sup>16</sup> Salmondiree, hirbondiron hirbondiral laabungal. Mofte\* Almasiihu on den fow salminii on.

<sup>17</sup> Mi wakkilinii on, yo musibbe an, e reenagol ko wonata sabu sendondire e pegge ko luutondiri e jannde nde hendidon nden. Wodsitee ben wonaybe sabu cfun. <sup>18</sup> Ko fii sifa ben yimbe kurkantaako Almasiihu on, on Joomi men, kono ko deedi mabbe din tun be kurkantoo. Be faljinira berde ben be bonnaa, kongudi mabbe weldi e waccooje. <sup>19</sup> Onon non, softaare mon nden ko nde yimbe ben fow andi. Awa mido weltoi fii mon on, e mido yidi yo on wonu faamube e telen-ma ko moyyi kon, e daybe e telen-ma ko boni kon. <sup>20</sup> Alla Jom buttu on muncay Ibuliisa ka ley koyde mon ko neebaa. Yo moyyere Iisaa Joomi men on wonu e mon. <sup>21</sup> Timotee, oo wondiddo an e golle, salminii on, wondude e Lukiyuusi e Yaasuunu e Sosipaate,

bee musibbe an. <sup>22</sup> E innde Joomiraado on, min oo wi'eteedo Tertiyuusi, mi salminii on, d'un ko min oo windudo nduu batakuru. <sup>23</sup> Gayuusi wernudo lan on, werni moftal ngal fow kadi, salminii on.

Arastuusa kadi, d'un ko halfinaado jawdi saare nden, salminii on, wondude e oo musiddo wi'eteedo Kawartuusu.

<sup>24</sup> Yo moyyere Iisaa Almasiihu Joomi men on wonu e mon on fow. Aamiina!

### *Jaaroore Rawnorde nden*

<sup>25</sup> Mangu wonanii Alla, on Waawudo tabintinde on, immorde e Kibaaru Moyyo an on e waajuuji fii Iisaa Almasiihu on, ko yaadi e fejninannde gundoo suudinoodo on gila ka fudsfoode saa'iiji din, <sup>26</sup> kono o fejnpiraama jooni defte annabaabe ben, wano Alla poomayankeejo on yamiri non, o fejnpiranaama leyyi din fow fii yo be gomdin mo, be doftoo mo.

<sup>27</sup> Mangu wonanii on Alla Bajjo, Jom Faamu, immorde e Iisaa Almasiihu on haa pooma. Aamiina!

**Version Pular Fuuta-Jallon  
The New Testament in the Fouta-Jallon Pular  
language of Guinea**

copyright © 2010 Pioneer Bible Translators

Language: Pular

Translation by: Traducteurs Pionniers de la Bible

Contributor: Pioneer Bible Translators

This translation, published by Pioneer Bible Translators, was published in 2011.

If you are interested in obtaining a printed copy, please contact [wab.admin@pbt.org](mailto:wab.admin@pbt.org).

The translation was completed in collaboration with Christian Reformed World Mission.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-02-06

---

PDF generated using Haiola and XeLaTeX on 11 Nov 2022 from source files dated 29 Jan 2022

024b8126-79ef-5039-bc54-7d61889f8ae6